

A Monthly Christian Magazine

AN ORGAN OF THE ZOU PRESBYTERIAN CHURCH SYNOD


Khristian Tangkou

ဗုဒ္ဓကမ္ဘာဝဏ္ဏ

တိဝဏ္ဏဗုဒ္ဓ

Vol. 59 || No. 09 & 10

Sept.-Oct., 2023



Editor: Rev. Dr. Hangpi Manlun

Synod Kumpuon:

[Siemchilbu 12:2]

NANG GUOLZAWLNA HI IN

Khristian Tangkou

Vol. No. 59 || Issue No. 7 & 8 || Sept.-Oct., 2023

Editorial Board

Editor : Rev. Dr. Hangpi Manlun - 9862910875
Joint Editor : Rev. Zamlianpau - 7629978067
Cir. Manager : Upa Jamsianmung - 9862086615
Bus. Manager : Upa Kamgenpau - 8974612937
Ms. Niangkhanmang - 8787560139
Nh. Tracy Niangsuannuam - 8731863384
Nh. Suanneiching - 8787790520

Cont. Editors : Rev. Awinkhankhup - 9383114081
Rev. Khupsianlal - 8974749874
Rev. Khamchinkhai - 8730933744
P/P Samuel Kham-suankhai - 8413817483
Upa Khupsuankham - 9863193371
Upa Tualkhanpau - 9862956570
Upa Thangzasuan

ZOU SYNOD ULIENTE

- **Moderator:**
Rev. Thangboi Khuongsai
- **Moderator Elect:**
Rev. P. Ginzalal Zou
- **Secretary (Sr):**
Upa Siendeithang
- **Secretary (Jr):**
Upa Ginsuankhai
- **Treasurer:**
Upa Thangchinpau
- **Statistician:**
Upa T. Lianminthang
- **Executive Secretaries:**
Rev. Dr. Hangpi Manlun
Rev. Zamlianpau

Copies - 1200

AMAN

Kumkhat ah	- ₹	100.00
Post ah	- ₹	200.00
Copy khat ah	- ₹	10.00
Life Member Fee	- ₹	1,000.00
Patron Member Fee	- ₹	2,000.00
Memorial gift	- ₹	2,000.00

A sung thu

- Guest Editorial 01
- Thu tuomtuom & Thumpi ding 04
- Na melmate uh tung ah melma..... 05
- Koppi sui ding dan 07
- Danglam ngam Gingtu 10
- Khrist a dinga kilamdanna 15
- Coram Deo-Pasian mai ah..... 18
- One world Government..... 19
- Suunna..... 22
- ZPYF Column 23
- ZPWF Column 24

Thusuo zosie Editor leh Zou Synod ngaidan ahi kimsih a, a suotute'n maw a kipuoh chiet ding uhi.

Thusuo dingte Editor kung a pieh ding ahi.



HUN HAMSA TAH LAH A EI GINGTUTE UMDING DAN LEH BAWL DIINGTE

Awle, hattuom misiengthoute hamsatna buoina kal ah tuni chieng tan a hing puitu i bieh Pasion min i phat masa uhi. I theisa bangun apeisa 3rd May nitah a kipatin ei dei leh ut pen hisih ma leh gal leh sa nei in tunidong i buoi den uhi. Tam tungtawnin i tenna leitung khu bukimlouna leh eima lung gel leh tup bangin bangma tung lou ahidan chetna hiding in i ngaitua lou thei sih uhi. Tuabanah, khawvel pumpi ah gal tampi na um leh zong tutung eigal nei u'khu alamdang in a tuom dieh chi lei zong i chi khiel sih ding uhi. Gentena khat peding hilei 'second rapture' chi thei phiel ahi. Inn tamtah kangin, mi tam tah in shina manna tuohin tunidong in i maban ding uh genthei bangma a um sih hi. Ahin, tam bang din mun a i dinlai un ei Pasion tate ding in hagau lam a theitop a panlah hun ahidan ang ngaitua sah hi. Tuaziehin hagau gal i satna uah tam a nuai i gen dingte uah a tha in panla ding in ikingen uhi.

1). Thumna neizing ding ahi.

I gensa bangin gal nei zing i hizieh un nidang bangin koiman nnasep silbawl bangma kineitheilou ahitahziehin ei gingtute eima innsung, i hattuom, i gam i lei ua ding nasatah a i thum zing hun uh ahi. Thumna khu ei gingtute a dingin hagau lam a i nahna uh ahi. Thumna khu i Mangpa Jesun tam leitung a aumlai in nasatahin athum zing hi. "Tualeh ama khu kidapguh in munsip lah ah thu angen tuuh hi" (Luk. 5:16). Thumna khu Pasion toh kipawl na leh ikul-le-poimawte akung a tutna leh ngetna ahi. Tualeh mihing leh Pasion kihouna zong ahi.

Tualeh, gingtu thumna ngaisahloute khu Hagau lam ah ah at ngaisih diing uhi. Gamdai gamgaw a singkung pou tui kitaploute khu akhantheilou bang un, gingtu thum ngailou khu a khangthei sih diing ua zong ah at theisih diing uhi. Miten, Billy Graham adam lai a, ah atna thuguh adawh u'leh: Aman a lawchinna thuguh thum a gen a, i). Thumna, iii). Thumna leh iii). Thumna ma achi hi. Amamai ahisih a, khawvel a Pasian mizah leh lawchingte thuguh khu thumna ma ahi chiet uhi. Thumna inei chiengun, Pasian toh kihou i hiban uah, adieh a en, Pasian kung a i kul-le-poimawte genna ahi. Martin Lutherin, hattuom sung a, Reformation abawllai in, "Tunin ka buoita luo dahkal thum (3)- maimai ka thum ding" achi hi. Abuoilou chiengin dahkal bangzat a thumta diei? Tuabanah, i buoi tung ua kipat in Pasian kung a i thumnate u'ziehun Pasian umpina leh panpina a kitang zing hi.

2). Bible sim zing ding ahi.

Bible isimchieng un Pasian in ikung ua thu ang gen china ahi. Masanglai hileh tu a, Pasian mizahte khu atangpi un, Bible sim taima leh ngainate ahi uhi. Eiten Bible sawm guh-le-guh (66), ineitah ziehun, Pasian in tami Bible sung a thute in ang houpi in pawl zing hi. Tulai, hagau mi kichi khen khatte in, Bible sim a Pasian aw zahsanging amau ngaidante khu Pasian Aw bangin agen ua, tambang a peite khu apei khiel/suolthei uhi. I Bible ma ua i kibulphu zing ding uh ahi. Tua hileh, tahsa-le-hagau ah i khang dih thei ding uhi.

3). Pasian beding (biehinn)- a kimutuo zing diing ahi.

Khristiante mawpuohna leh hagau lam khanletna diing a sil poimaw khat khu Biehinn kai ngaisah ahi. Gingtu hat leh hatlouna tena khu Biehinn kai taima leh taimatlou ah a akitheithei hi. Hebru 10:25- ah "Khenkhat chindan bang hilou in i kikhop uh tawpsah sih va-ui" chi imu hi. I dam liei leh kikhop/Biehinn kai pibawlle Hattuom hat leh pichinlam manaw zing i himai diing hi. Tulai gal leh sa lah a biehinna kai nuom lei zong dachiengin kaitheilou hun ang tung ding hi. Tuaziehin, ahithe tan ah i dam nah leh Pasian bie ding pan i la tha ding uhi. I gensa bangun i khuo hing kihalpieh chiengin i biehinnte uh zong haltuom in a um ua, tua munte ah bangchiengin Pasian i biethei kia ding uoi chite i ngaitua leh tunitan a i biehinna ua ikaithei na laite uh hampaha i hidante thei panla tha chiet vaui.

4). Silpieh:

Khristiante mawpuohna khat ahikia leh Pasian guolzawlina imu bangbang a sawm-a-khat leh silpieh tuomtuomte Pasian kung a pieh ahi. Luk. 6:38-ah “Pie in tuachi in pieh in umvateh” chi imu uhi. I Bible i et u’leh Pasian in mizousie kung a, aphut khu Sawm-a-khat ahi (Malaki 3:1-10). I Haitha masa penpente zong ipe diing uhi (Exo. 23:19). Mangpa masang ah koima khutguoh in ikilah diing ahisih (Exo. 16:16) chite imu uhi.

Pasian kung a silpieh pe utlou khu Pasian suomna leh guhtatna ahi. Pasian guoljawlna hing lut diingte dalna zong ahi chi in agen hi (Malaki 3:10-11). Pasian in A tapa neisun ang pieh ziehin eite’n zong i nei i lamte itlou kei in ipediing uhi. Tulai a sildahuoi khat ahileh, Pasian thu-awi leh sakhuomi dihtah hi a kingai a, Sawm-a-khat leh silpiehte ngaisih chia zilsahna khu ahi. Tambang khu i Bible uh toh kikalna leh ngaidan dhlou a hi. John Wesley in, “Mi apientha leh asumbawm zong apientha ding ahi” achi a, agendih hi. Tualeh gambuoi zieh, genthei ziehte paulap a Pasian guolzawlina i tante daltu leh paulap a nei lou ding a hi.


5). Manggam nasepna.

Gingtu zousie leh Hattuoimte nnapi pen khu Missionary nnasep ahi. Tam khu Pasian lungsim leh adeidan ahi. Pasian in Missionary nnasep angaikhoh mama a, tuachi’n Atapa neisun ahingsawl a, tualeh Jesu’n eite ahing sawlsawn hi (Matt. 28:18-19). Missionary nasepna khu lam thum in isem thei uhi: Tuate i) Eima vakuon diing ii). Silpieh a sep diing leh iii). Thumna/Thungetna toh sepding chite ahi uhi. Tamteng lah a khat teitei a gingtute ipan diing uh ahi.

6). Mangpa Jesu hing pei ding lam en tah a ngah ding ahi.

Ei gingtute pen, Mangpa Jesu hingpei/kilah hun ngah a gin-umtah a hing diing a hatte ihi uhi. Pasian in ama diing a shingal pai diing in ang han sih a, ama diing a gin-umtah a hingzing a, ama lam-enzing ding in ang dei hi. Ama a diing a hin khu Khristian hinkhuo ama deibang leh Khantanhoi toh kituohsah diing china ahi. Tam khu, Leitung leh Pasian in gingtute hinkhuo a, a lam-etzing ahi. Khawvel peidan i et leh Mangpa Jesu hing pei hun ding naita mama ding in i gingta uhi. Tulai siltun dante iet chiengin tam leitung khu sotdai ding zong a gintat um nawn sih hi. Tuaziehin, unau hun hoinei petun tam a tung a igente uh mawh tah bang leh zong hagau lam a kibulphu sawm chiet vaui. Mangpn simtute hing guolzawl chietta hen aw.

Thy tuomtuom leh Thumpi dingte



1. Pasion lungsietna leh mapuina toh i gamsung buoinate kawmkaal ah October ha tawp i tung touta ua, tam tan hing Puitu Pasion kung ah lungdam thu i gen uhi.
2. Pasion mapuina toh District level Khawmpite i zou tou thei ua, tam tan hing puitu i bieh Pasion min phat in a tungah lungdam thu i gen uhi. Tu in Syned level Khawmpite i mai uah um ahina ah Pasion dei bang leh lungnuomtah a i zah theina dingun i thumna uah laan chiet va ui chiin i kingen uhi.
5. Tribal zousie kipumkhat a, tup kibang a, a tawp tanpha tuibang i luonkhawm theina ding un thum va ui.
6. I gamsung buoina zieh ua, Frontline a sumlezan a Duty Volunteerte a ding in thum va ui.
7. I kingatna pen uh Pasion i bieh ding bang tah ua i bieh ua, a nna i sep theina ding un i gam Central Government Vaihawmte a ding in thum va ui.
8. I gamsung buoina zieh a thalemat tuoh a hinna taante tengteng i suun mama ua, a Innkuonte un hamuonna a nei theina ding uleh liemlebai tuoh a Damdawi Inn a kienkolte zousie a hing damsienng theina ding un i thumna uah thumpi va ui.
9. I gam buoi zieh ua innlelou i taan uh Imphal Hattuum, Sugnu leh Mangjing Mission Field a ding in thu m va ui.
10. Tribalten i lungtup uh “Saperate Administration” i mu theina ding un bangkim bawlthei Pasion kung ah thum va ui.



NA MELMATE UH TUNGA MELMA KA HI DING HI

- Upa Thangzasuan
Kanan Veng.

Bible tangtel: *“Hinanleh, Ama aw nangaikhiet a ka thugen zousie na bawl leh na melmate uh tung ah melma kahi ding a nang hing doute ka dou ding hi. Mangpa Pasian in a chi” hi (Pawtdohna 23:22).*

I Mangpa leh Hundamtu Jesu Khrist in khelna zieh a dannuoi a saltang eite hundamna tang thei ta dingin ahing tandoh ta hi. Hinanleh agingta louten vang atang thei tuom sih ding uhi. Tuleh ei agingtute zong khu hundamna tangta ihi nai tuom sih uhi, tuaziehin damlai gamdai ah gim leh genthei thuoh in ikhosa nalai lai uhi. Damlai gamdai ipel mang un Hundamna zong itang thei nai sih ua, sa leh gal zong abei thei nai sih hi. Tuaziehin tu in zong Meiteite toh ikidou lellel uhi. Kidouna pen ngap leh ngap kidouna aum a, min ahing bulu zieh a alou theilou a, dou ngai zong aum thei zel hi.

Bangteng hita leh zong i Mangpa Pasian in nang hing doute ka dou ding hi, achi zieh in, iha muong mama uhi. Mangpa min loup i phatin umta hen, Mangpa Pasian in Adam pasal, ana bawl lai in, tenna dingin gam leh lei adei ding hi chi athei masah zieh in gam hum a galma a ding ngam dingin a na bawl hi. Humpi bang a hangsan dingin akhamul zong apousah hi. Hundamna Pasian gam itun masang sie un tenna ding gam khat apoimaw mama hi. Tua itenna uh Manipur gam pen Kapu, Kapa gam ichilai un, Meitei ten gamtuom mi nahi uhi, chi in thabei ding, nawmang ding ahing sawmta uhi. Tuaziehin, ut leh utlou thu umlou in chin leh ha toh pang in ina kidalta uhi. Ama uh pen, Milim bie ahi ua, Manipur a nam tam pen ahiban

uah, thuneina sangpen tawi ahina lai uhi. Phaijang gam neunou khat ah ateng dim phitphet uhi, Patung, Papah pouna ding zong ong nonlou bang ahi.

Ei Singtangmite pen Khristian ihi ua, Anam tawmzaw hinanlei zong gamlien dengdong pi uap in, iteng koikoi uhi. Tuapen Unau Meitei ten Thangching taangte, Kailam taangte leh Hausapi vum a pan mit nuoi zet in, ahinggal etet mai uhi. Zougam huisi laang hiuhiau nuoi ah, Tumlam, Suolam, Sim leh Mallamte a en ua, Zougam hing ngiingei te leh lien dengdong maipi a enla mama mai uhi. Ama uh gam a tuin, Naangniai nuoi leh san keikui toh ate uleh, Zougam damtui luong selsele a-am mama uhi. Tanglai Israelten, Khuaizu leh

Bongnawi luonna, Kanaan gam a gal et uh bang mai in, amu uhi. Manipur gam la hing gal ette ding uleh thu aneikhum ding uh, dan in phallou zel, tuami a ih mutmaw na pen uh ahi khu, tuazieh a Phuro, phuro, hatlo, hatlo ang chi uh ahi. Hinanleh Ama uh khopi mi ahi zieh un, nuom asa mama ua, tuaziehin thau a tawi ngai sih ua, zong akap ngai sih uhi. Akapkha sunsun ten zong amitsinsa ua, akap uh ahi. Tuazieh a Commodo-te, ama sot ngengngong uh ahi. Hinanleh amaten zong mithahsa in, akap ngam tuom veve sih uhi. Tuaziehin Asiempote, maibi, maibate Aisan ding in asol zel uhi. Amaibite un, ei pasien sangin Ama uh Pasien hatzaw hi, kuonda mai un chinan uleh akuon teitei chiengun, agintat uh bang loutah in a tuoh sie ua, alungtang uh khuoinun bangin azon mangta hi.

Mangpa Pasien in nou hing dote ka dou ding hi achi atahtah a atang tunsah tahzieh in, hattungtung Pasien amin loup ka phat ahi. Tutung ibuoina pen Tanglai Israelte leh Philistia gal bangin kangaituo hi. Aziehphe Milim bete leh Khristian kal ahiziehin Pasien lemguot ha ka chita hi. Eiten Pasien thu i awina uh kumza (100)- valta a, ama un tu nitan tan a Pasien Biehin ahalna lai va long uh khoikom a gotdan siem

pa bawl nuom khat nei hiding ahi.

Akhatna ah, tutung ibuoina galpi pen, Meiteite a ding a Missionary huoisie hing suoh mai thei ahi. Hattungnung Pasien mel, amu na uh hing suoh mai thei ahi. Anina ah ei singtangmite a ding a lungmuong taha itenna ding leh Ama Pasien iphat theina ding gam khat, hingpe ut himai thei ahi. Tuaziehin tutung kidou na pen thanop huoi kasa mama hi. Ei gingtuten Pasien gal idou chieng ua, Numei, Naupangte leh Tehsete suhgenthei lou ding ahi. Tualeh Numei tunga tatsiet lou ding ahi. Ei hing giing a taite zong nuadeldel lou mai ding ahi. Tua hileh Mangpa alungdam ding a, mitsinsa a, thaukapte tung ah guolzawna puonlap hing domsang sah ding ahi. Mangpa kung ah hathum in thum vai in, Mangpa Pasien in Kanaan gam hing pe ding ahi, hingpe ut ahi, tuaziehin Khanglaite aw lungkelou in, hing pang ta un ishi leh zong shi manpha ahi ding a, ihin leh zong Gam ei a hing hi ding ahi. Namsau hiemzieh in gal akizou tuom sih a, Sakol taihat ziehin koima a bittuom sih hi. Mangpa muongten guolzawna tang ding ahizaw hi. Gallai ahi zieh a gal thu igen ahi simtu zousie, akhietdan na theita un. Mangpan hing umpi chietta hen,.Lungdam ing. Amen!!!

**GALLAH SALAH A UM HILEI ZONG PHALBI HUN KHU
ZI LEH PASAL NEI HUN AHIZIEHIN KOPPI SUI DING DAN**

(Bible simding: Genesis 2:18, 21-23; II Kor.6:14); Hebru 13:4).

Thumapui:

Awle, mihing khat apieng ihileh zi/pasal nei hun chieng a inei ding khu Pasian hing siemsan leh i um ding dan mong uh ahi. Ahin, pichin nua a khat vei beh tambang hinkhuo ngaituolou/neitheilouna khu mibahlouna amaw, damlouna jieh ahithehi hi. Tualeh zi-le-pasal ding pen Pasian kung a jong i thum a inget jing ding uh a hi. Dr. Billy Graham kung a mi khat in Khristian Innkuon khu bang hun a pat ding e, chia adoh chieng in aman, “Zi/pasal nei masang kum thum vel a pat ding” achi hi. Tualeh, damsung a koppi ding isuiding chieng un pilvang tah in isui ding uhi, ahisih leh ibawlkhiel ding ua ahin aphattuom sih ding hi.

1). Pasian in a pan hi.

Pasian in khawvel leh asung a siljousie asiem jou in a en a hoi asa mama a; ahin asilsiemte lah a, aman hoilou chia a gen masah pen khu pasal ama tang a aum khu ahi akichi hi. (Gen.2:18). Mr. Miltonin, “Bible a Pasian in asil siemte lah a hoilou chia agen masah pen khu pasal amatang a um ding ahi” achi hi. Tualeh Pasian in ami siem masahte kung ah “Hing pung unlen khawvel hing luo dim un” chi’n aguoljawl hi. (Gen.1:28). Tuajieh in, koppi hoitah nei a hah-le-suon nei ding khu Pasian deidan ahi chi a chieng hi.

2). Thawmhauna.

Judate Rabbi khat in, “Pasal in anahgu khat amansah akipan in a um maimai thesiah a, tuabang ma in numei jong aumna ding mun atun masang in a um maimai

thei tuomsih” a chi hi. Tuajieh in khatvei beh dam sung a ji/pasal ding a lungkham lou chi pen mibahlouna leh damthei louna jieh ahithehi a, tuabang mite khu akinlam Doctor ki-etsah pai ding ahi avai gei masang in. Tualeh, America Council of Life Insurance-te suidan in America gam a mi thawmhau penpente khu College a zillaite (Student)-te ahi uh achi uhi.

3). Tualeh, kopi ding zi/pasal suidingten isuiding dan uh Saptan “B” li (4)- leh eiham a ‘B’ khat a poimaw a agente uh i en ding uhi. Tuate khu:

3.i). Background. (Kipatna/pienna).

Tamkhu ipienkhienna, khan letna leh hahtute tan a etchet ding china a hi. Masang lai-in ipu/paten jong tamkhu angai khoh mama ua, hahtute apat mi toh

kituohlou, damlouna kilawtheinei, (T.B, khantom, tulai a HIV&AIDS etc)- ngaituana chinglou leh adangdangte khu ana enchien un tuabangte zi/pasal ding ana nuol uhi. Tamte khu tulai lungtang lam sui (Psychologist)-te leh itenna mun-le-kim leh pam sui mi (Environmentalists)- ten jong angai khoh mama uhi.

3.ii). Brain. (Huoh/lungsim) lam:

Mihing tahsa piching thoungal, ahin lungsim lam a piching lou leh hoilou leh sienglou/ venglou mi atam hi. Milungsim koi, mi toh kituohlou leh hoilou zong etchet ding ahi.

3.iii). Belief (Ginna) kibahpi:

Khanglai nungah/tangval koppi suidingten gindan kiabahpi leh mpiengthate ma isui ding uh a hi. Tualeh kiten nua chieng in kisiempha ding chite vel kilam etlvotlou ding ahi. Thamlou in khamthei ching leh nete ji/pasal asuilou ding ahi. Tambang mite kitenpina khu ahunlou a meithaina leh ji-le- ta ahunlou a sun ding china ahi

Tuaban ah, Khristian nungah/ tangvalte ading in zi/pasal ding a ginglou mi, doctrine leh gin dan kibangloutaluo mite sui lou ding ahi, ahisih leh kiten nua chieng un anua in buoina leh kituohlouna atun thei hi. Thamlouin, tuaban ah gindan kibahpi lou adieh in kol-le-vaite bang kitenpi lou ahoi dieh hi. Ajieh ahileh Bible in,

“Kituohloupi’n ginglou mi toh hahkol puokhawm sih un” achi hi. (11. Kor.6:14).

3.iv). Bil (ear) a suiding ahi.

Tulai ikoppi ding isui chieng un amel hoi leh duang chingte i en masa uhi. Akhenten lah alasiem jieh bang, ahausat jieh bang leh akhente ngel in facebook pou tungton in zi/ pasal ding asui ua anua in bauina leh kikhenna atuohlaw va-dieng uhi. Ahin, ikoppi ding pen ibil un isuimasa ding ua, tuami umzie ahileh ahindan, amizie leh gamtat dan athei mite kung a doh chien masah ding china ahi. Adieh in hattuom lamkaite (Pastor leh Upa)-te leh mi muon huaite doh a, ama un ang lungkimpi nah uh leh ahoi tangpi ding hi.

3.v). Beautiful (Handsome) Melhoi:

Koppi ding suidingten izi/ pasal ding isui ding chieng un tamnah ipan ua, ahin amasa lite khu apoimaw masa dingte ahijaw uhi. Tamna igensate, background, brain, belief, bil asuding chite masah jou chieng un tamna beautiful or handsome ah itusuhpan ding uhi. Tualeh kiten masang a jong mel leh puom ajong lungkim sam ding ahi ahisih leh kinin na leh kimudapaina jong atung thei veve hi.

4). Tualeh koppi ding isuiding chieng ua, aku-le-poimaw mama dangte khu:

4.a). Sipdede ding:

Adam in ajiding asuilai in

Pasian mai/angsong ah siptah in a ihm chi ithei uhi. (Gen.2:21-24). Missionary Jim Elotin, “Mangpa deina mun a ih mu (khawldam)” achibang in. Pasian kung ah theitopsua in iziding/pasal ding ngen in siptah in thum in um lei aman ikul-le-poimaw theilua mama ahichieng in ahun tah in ang pia na ding hi.

Tuaban ah, Isak in aji ding asuilai in lungluttah in apa (Abraham)-nna gin-umtah in asem a, apan akul-le-poimawte thei ahichieng in ahun tah in asuohpa Eleazar khu sawlin Rebeka khu avapui mai hi. Pasian jia ngahjou a gin umtaha Pasian nnasemte khu atop ah lawching teitei uhi.

5). Tualeh isuiding mite

5.i). Na kum kibahpi sui in.

Numei pasal nei hun akigen tangpi khu kum 20-30 kikal bang ahideu hi. Tualeh pasal pen kum 26-40 kikalte ahideu uhi. Ahin tualai siemna pilna leh khantouna tuomtuomte jie in zi/pasal nei ha/ vai gei jong akhoh khol sih hi.

Tualeh, kum kikhiet luat khu ahoi sih hi. Adieh in numei khu pasal sang anau pan joh hamham ding ahi. Tualeh, kum ikikhieh luot chieng un anua ah buaina atun law thei hi. Numei pasal sang a-upat jawh chieng in pasal in nu bawl in abawlthei a, pasal a-upat luot jawh chieng in lah numei in pa/pu bawl in abawl kia thei uhi. Nupa pen

lawm bawl akibawl ding ahi uhi.

5.ii). Siemna pilna ah.

Siemna pilna ah jong kikumthei leh ahoimama ding hi. South India ami khat in America a ‘Scientist Research Centre’ ah Ph. D ajou hi. Ji mawltah khat anei kha a, aman niteng in siltha tha a mu khia jeljel a, tuachiin asiltha mute aji kung ah agen jeljel a, aji in angaina thei lou in angaisah sih a ama siltha mukhiehte ahileh tuni in “Ih ahpi opve aw, ivatotnou keute “chibang pou in ana dong jel hi. Angaidan uh kibanglou lua ahichieng un apasal khu lungkham in ashilo vot akichi hi.

5.iii). Tahsa leht dan thu ah.

Atangpi in Pasal khu numei sang a alet jawh ding khu duthusam ahi. Pasal sang a numei alet joh chieng in aguh in musitna anei nuom a, apasal in atheikhieh chieng in amanu sang a hatjaw hi leh silbawlthei hi na a sulang utna-in, tha gum leh gam tat (violence)-te in suhlat asom jelel hi. Thamlouin, numeiten apasalte uh mau uh sang siemna pilna sang jaw leh silbawlthei hi le uh aut jaw uhi.

5.iv). Nam/Chi kibang hithei leh.

Nam tuomta lua leh ham-le-pau kibanglouta lua akiten khah chieng un, aguh in buoina atun law thei hi. Ahin tambang a Nam tuom pasal nei dingten a thei ding uh ahileh: (i). Amau hindan tahtah uah na hing theina diai? (2). Aman hing dei leh jong a innkuonpiten

ang deitahtah na ding uoi? (3). A innkuonpite na lungsiettah theina diei? (4). Aham apau uh leh a culture uh na jilpei in na siem tahtah na diei? Adieh in numei nam dang neite khun aham apau uh a siem ua, a jah ding u'khu silhoi ahi.

Tulaitah khu chi leh nam buoina ahiziehin, nam tuom neite a ding in hasatna leh utlou sasa a kikhenna nupa tamtah in a nei ua i puohnatpi mama uhi. Tambang din mun a umthei zing i hiziehun pilvan a huoi mama hi. Unau Mizo ten zong nam dang tawh kiten khu ana ngai khawh mama ua, Nam dang adiehin singtang mi hilou tawh kitengte bang MLA kitelna ha kia a neina ding uah ticket piehlou ding chin a gen uhi.

6). Zi/Pasal neisa toh kiteng dingte thei dingte:

Zi/Pasal dang neisa ahin na kikhen ahisih leh na kidamlousan te toh jong kiteng ding na hileh pilvang tah etchet masah ding a hi. (i) Akitenpi masah pen toh akikhen

tahtah na uoi? (2). Kumbang jat asawt ana kiteng ta uoi? (3) Akikhen nua un bang chiin aum jeljel na lai uoi? (4) Bang jieh akikeh ahi uoi, Koi dih lou jawh e? Ta leh naute aneita uoi? chite thei masah ding ahi. Atate khu nata bang in na enkawl tahtah theina diei? chite kingaitua masah ding ahi. Tuaban ah apasal/zi in ashisate ahilel bang jieh a shi e, tulai natna nei bang jong hithei ahijieh in pilvan mama ding ahi.

7). Ahitheh leh kiteng dingte khu sisan ki-test masah ding in ahoita hi.

Tulai natna jau huai HIV/AIDS chite leh natna jau huai te ziehin ahitheh leh kiten masang sisan aki-test mai jong sia lou maithei hi. Ajieh ahileh tam natna khu kum bang jat ahiei khat ahing kilang ahijeh in. Tam atung a igente uh khanglai ji-le-pasal sui dingten thei in juithei le uh a bawlkhiel sih ding uhi.

DANGLAM NGAM GINGTU HINKHUA

Rev Dr. Kh. Khaizakham

1). Thumapui. Good Friday leh Easter mang dinga April 13,2017 ni a Kohima zuon a ka pei lai in whatsapp group khat ah tam message “Emi singnuoimi (UG) khat top ut mama, lah topthei talou, nikhat laihah aguh a giel in, “HAT LOU A HINGPANG KAH I IN, SAWLLOU IN KA KINUALE TA... lamkaipu, bye” chin nuasie ana dap pei hi. Koi ahiei khat in chiemmui na dan a ahing giel hi maithei ahi. Hinanleh tami’n ngaituona khat ka lungsim ah ahing kilang sah a, eite gending khu “Mang Jesu, nang hing hatna dawng a hingzui kahi a, na hing nua

sawlkia loungal leh hing nuasie sih vang” chi hi leh. Gin um a Mang Jesu nuazuite khu danglam teitei ding ahi. Kum 2016, October ha in Mumbai ah EBC leh ZCF kigawm in camp guntah a guonggal uhi. Mumbai leh Pune kikal a singtang khonuom tah Khandala ah kaki camp uhi. Catholic te retreat centre nuomtah mai ahi.

Tam camp ah Mumbai khopi sung a umte mai hilou in, Campi thupi ana thei a lunglut mama a, amau a dinga Pasian in gennuom nei hi ngeiva chia England, Qatar, Mauritius leh Andaman gamte apat a hing pang zong a um hi. Campi sung ah Pasian houpina tang in kipahtu ahing genchiet uhi. Sum tampi seng a hingpang ahi ua, a sum sen uh kithaman sa chiet in akile kia uhi. Ka gen nuom khu tam Camp thupi khu poimaw kasa mama a, tam thupi zang a tam article hing giel ka hi. Camp thupi khu (Sap ham) mangkang ham in ‘DARE TO BE DIFFERENT’ ahi. Tam thupi mama khu February 9-12, 2017 sung Delhi EOC khanglai Camp azong thupi in aki zang kia hi. Khopi a khawsa khanglaite’n Mang Jesu ading a hinkhuo danglam bik, piengtha tan mai a lungkimlou a khovel mitmu ngei a hinkhuo tuom leh danglam zah a ut dan uh kamu a, lungdam a um mama hi.

Camp hun sung a ka na ha gen khu Sadrak, Meshak leh Abednego te apat chouna thu ahi

deu hi. Tulai in um hile uh tam lawmta mithum te leh Daniel in Pasian min toisang mama ding uhi. (Tam article ah lawmta thumte kahing tahleng deu hi). Amauh te khu amauh hun a dinga ana hing ahi ua, eite ahileh eihun (tuhun) a ding a hing ihi uh chi ngaituo tha va ui. 2). Tangval thumte apat muthei hinkhuo khu. Khovel toh kilemlou a, Pasian zaudan siemtah a hinkhuo zah ding chi ahi. ‘Milim mai a va kun zuol mai mai a, I lungsim a igintat sih pou leh khawh sih, chi maimai mi ahi sih uhi. Milim mai a kunlou ding khu a ngaituona uh ahi mai hi. Pasian in a hunkhe thei chi a muongngam ua, hinanleh a ginna det zaw khu “A hing hundam lou ding hinanleh na milim bawl mai ah kuun sih vang” chi ahi mai hi. Lengpa thupieh va nial mai khu saltang mithum te leh lengpa khu a dinmun uh akibahlou lou maijen toh maw! Hinanleh tam lawmta thum te’n leng thupitah sangin amah tunglam peh ah lei leh van siemtu Pasian khu a mu zing uhi. I mai a ding zing melmate sangin i tunglam a hing en zing Pasian mu zing khu galjawna bulpi ana hi leng hi.

Kilepsan lou a ginum tah a abieh zing uh Pasian in a manghil vawtsih hi. Lengpa thangpai mama in meiphuolpi ale sagi a sasah ding in thu apie a, tua sung a selut ding ahi ta uhi. A mei a sat mama zieh in a seplutte zong a

hullum hi. Hinanleh meiphuolpi bang chibang a sa ahiei chi a thupi sih a, meiphuolpi sung ah koi in a umpi ei chi a thupi jaw hi. Meiphuolpi sung ah a puonmong uh hiin, a samzang khat uh zong akang votsih hi. Lamdang tah in mi thum khu mikhat in ahing belap a, lungmuongtah in meiphuolpi sung ah a vahkhawm uhi. Lengpa'n zong amu a, "a li napa melpuoh khu Pasian a bang hi achi hi. (Danial 3:25).

Aw khai, ginum a ei zong i panzing pouleh a lina a pang Mangpa'n hing umpi zing ding ahi. Bible siemte sutdan in meiphuolpi sung a hing umpitu khu Mang Jesu (Pre-incarnate Christ) ahi chi uhi. Ngaituo wawi, tangval ginum thum Ama min a meiphuolpi sung a kisep lutte khu van apat a hing peisuh vengveng in ahing umpi hi. Mangpa lungtang sukha a akipiehna un a bieh uh Mangpa khu a hankhie mai uhi. Mit a muthei a Mangpa akung ua ahing um mai khu thupi na va-ia e! Gin um tah a migam a ava umna uh khu a missionary nasepna uh thupipen ahing suohta hi. Lengpa'n tuabang a meikuong in bangma alaw zoulou dan leh umpitu a neidan uh a mu in tam tangval ginum thumte Pasian khu gingta (believe) hi ding ahi.

Lengpa thupuon khu thupi hilou amah? Missionary nasepna thu tampi isim ta ua, tangbang , a um nai sih hi. "Tuaziehin thupieh

ka bawl ahi, michin, namchin leh ham chin ami koipou Shadrak, Meshak leh Abednego Pasian tunga thu hoilou gen pouma satnen in a um ding a, a innte uh vutvam asuoh ding hi, a zieh pen tangbang hundoh thei Pasian dang a umsih hi," a chi hi (Danial 3:29).

3). Nebukadnezar in a gamsung Babulon gam ah a kaisang sah ta hi. Ginum a Pasian bie a, khawvel bawldanzui mai lou a, danglam ngam tangval thumte apat Pasian deidan hinkhuo khu imu tahi. Tulai hun in amaute apat bangchi kalsuon ding ihiei chi zilkhiet bang inei tai chia ki ngaituo tham ching ahi. Tuhun a zong amai a kunchiet ve, kun mai ding hilou amah., chi ngaidan a tam mama hi. Tulai mite tampi a kun na uh tamte ahipen hi.

Sum-le pai mai a kunna : Gawlguh, nehguh chite a petu leh a latu akibang ahi. Sum a kipahna sui aki tam mama tahi. Laisimte thumsah ding dan tangbang hileh ahoi diei; "Aw Pasian, nang ding in ginum zing ka ut a, ka lekha simna hing panpi in, siemna hing pie'nlen, sepna mawngmawng sum a leilou a ka gielkhiet zaw teitei theina ding in hing panpi in" chiiin theitop suo in lekha simlei Pasian in hing dawng ding ahi chi ginglel sih vai.

Tam atung a igen khu a bullam suhdih ding a um hi. Chiindan dihlou mawmawng zanglou a lekha simna a ginumna leh dihtatna peipi

ding manghillou ding ahi. Pasion in ahing guoljawlthei nading a kukal tah a lekha sim ding ahi. Lawm leh gual toh kithuo manlou zen a lekhasimte miphalou tam sih va. Laisiem leh officer masa khat in simlaite a hasotna ah, “Ka shi leh ka shi chiin lekha sim un, tuahileh shi zoudeu lou ding na hi ua, hun giap pan ding ahi” achi hi. Khanglaite ding a hasotna poimaw tah kana genzel khu “Mi lawchingte khu lenlai chaan ngam a khonung ding kibawlte ahi uhi.” A hi mawng ahi. Mi lawchingte va houlimpi lechin ‘short cut’ zui um lou ding hi. Lamtou sau tahtah hing zui tung te ahi uhi.

Mite’n zong bawl hiven chia a hoilou theizing pum a silbawlte khu a silbawl un lawchinna lampi a khah sah hi. Nungah-tangval- a buoibai taseng te mi lawching a tam sih hi. Tup kichiantah nei a i tunna ding uh tun masang a lawmngai a kisuhbuoi lou ahoipen ahi. Kitahla bai sengte khu tunna ding tungzou umlou uhi. Kingaina thanghuoi diehdieh khu melma thupitah ahi. Na tunua nopsah na ding zousie baitah a sex maitam a na latkhiet leh na kisia vangin na bawl dih thei tasih ding hi. Gitlouna Pasion in a ngaidam thei a, hinanleh gitlouna’n tahsa a suhsiet te khu mawh bawltha thei ahi sih hi.

Zu leh sa leh khamthei bang hizong leh chiem (taste) lou ding a kithunun te khu mi muonhuoi/

suonhuoi ahi uhi. A khanglai hinkhua a zu-le-sa chiem khalou a kisia mama koima akimu sih. Zule-sa a naki buol a tawpsan theilou a kisia vangut vang mu ding a tam mama hi. Mipil leh kithunun te khu kuva, zatep, tuibuh, khaini, talab chite ah koima akisubua sih hi. Poimaw lou a sum senna mai hilou in, tam silbuate in ahing puohkhiet natna chikim i maituo zing hi. A poimaw pen khu tam silbuate apat a kikem siengthou zouloute khu a gingu hinkhuo ah zong chitlouna lientah nei ahi zing hi. Etton tahlou hinkhua khu hinkhua pamai ahi.

Mit a mu ut sil kidah huoi tamtah, khanglaite puimang leh hinkhuo buatah a puilut thei tulai/ tuhun in a tam hi. Blue film ana kichi zel film thanghuoi, numei pasal thanghuoi tah a kipawl na ahing tun masah lai in, a um hi chi kithei nanleh et tei vasomlou te khun aki mu dieh sih hi. Hinanleh tu in i cell phone apat mu zing thei ahita. Khamthei suoh a saltang a tam bang in tulai in ‘internet pornography’ a saltang a tam hi. Tuabang milim bua tahtah te et zieh in tulai in huasanna leh thanghuoina a huoise mama hi. Naupang kum chinglou nangawn pawngsuolna, nungah-le-nungah ki deigaw, Pasal-le-Pasal kingai chi te, nidang a athu maijong ina thei khahlou te tu in igamsung uh a hing tungta hi.

David in Bathsheba

guohtang a kisil amu khu live porn ahia, tomkhat sung a et in a lungsim ah angkhawmna ahing lut a, azi hiloupi a innsung a hanlut in a khelpi ta hi. A kisiana nat dan khu Late (Psalms) ah aki mu tam mama hi. Tambang a Pasian kipahna David khu, manghil ngailou ding tanchin hoilou tah, mi zi toh a lupkhawmna thu tuni tan in genzing in a um hi. Hei a hing kipan ahiei chia isut leh a mit a guohtang a kisil amu zieh ahi. Numei guohtang a kisil koima'n nichin in mu sih va. Hinanleh nang a khawhzo na phone ah na mutthei zing hi. Na Khristian hinkhua a dindet zing na ut a, danglam tuam khanglai hinkhuo na zah ut leh na cellphone ana laan siengthou in.

4). Na hun awng zousie silpha in sudim in. Laibu gieltu khat in, “mi thada/thasie ngaituona khu setan workshop ahi” ana chi a, a gendih mama hi. Nang matang a hun awng nanei tam tahluat leh setan in hun lemtang mu zing ding ahi. Silhoi in kisubuo i zing in. Hun awl na nei taphot silhoi bawl na'n zang in. Loi-le-gual khat panpi in. Insung na poimaw khat vabol mai in. A poimaw pen khu, na Bible simna ah hun na zah thei zaza, atam theipen zangin. Laibu hoi khat kilei inlen, kal khat na hun awl sung in simsuoh som in. Laibu hoi a tam theipen lei som in. Silhoi bawlding

ngaituo lou a hun awl mawh zah te'n Mangpa deilou lam bang ahiei ahing bawldoh zel uhi.

5). Nichin in Mang Jesu toh zawhkhawm dan zil in. Hagau Siengthou puina ngaina zingin kalsuon in, Hagau Siengthou sulungkham sin. Ama tenna biehinna hita ngal a. Ngaituo vawi, Pasian hilhiel nang a ahing um mai khu. Nichin puitu ding a hing luotu Hagau Siengthou ahi. Na pientha ni apat a hing puitu ding a nang hing luotu ahi. Ama ngaisahlou a, a aw zong na kitheimawbawl leh Hagau akipah ngai sih ding a, tuahun chieng in kipahna mawngmawng na nei nonsih ding hi. Pasian Hagau Siengthou hilhial in ahing tenkhum ana hi va-ia hi. Eima hatna toh khovel a kalsuon zoulou ding ihi thei in Mangpa'n Hagau Siengthou khu puitu dingin ahing pie hi.

Gending tampi um nalai va. Hinanleh danglam tuom ngam hinkhuo zahna dingin atung a thu poimaw mama te manghil lou in kalsuon lei i loi-le-pai lah ah leh i tenna mun taphot ah mite'n ei ah danglamna khu hing mu va uh. Danglam ngam gingtu hiding in Mangpa'n hing umpi zing ta hen. (Note: Tami article khu Rev. Dr. (Kh) Khaizakham in ZPYF iamond Jubilee Souvenir a. a gel kisuo sawn ahi).

KHRIST A DING A KILAMDANNA

(Rom 12:2).

Rev. Dr. Hangpi Manlun.

Thumapui.

Tulai gingtu tamtahte khu i zui uh Jesu a ding a kilamdannna hinkhuo nei lou itamta mama uhi. Amin a Khristian chi a kimin vaw maimai zong itamta uhi. I Pasian thu awi uh zong biehin sung maimai a zang a, ipawtkhien chiengua, gingloute bang a um kia mai khu tulai gingtu tamtah hinkhuo zahdan hileh a kilawmta hi. Tuaziehin, Khrist a ding a kilamdanna chi thupi tungtonin ikikuom ding uhi.

1). Khrist ading a ikilamdan theina ding un Tui leh Hagau a pienthana

dihtah i nei masah ding uh ahi.

Atung a, i genbangun, Khrist a i kilamdantheinna ding un, Hagau a pienthana dihtah i nei masah uh angai hi. Sawltah Paulin, “Tuaziehin mi koi zong Khrist a a um leh silsiemtha ahita hi. Silluite a beita a, ngaiun a hing tha ta hi” (II Kor.5:17) a chi khu ihinkhuo ua nei a ngai hi. Hagau a pienthana dihtah i neisih uh leh Khrist a dingin kilam danna ihinkhuo uoh a umtheisih ding hi. I Mangpa Jesu khu a pien masang kum 700-ding

dang bawlte ah a kimuchieng mama uhi. A pien masangin Jawlnei Mika in a piennna mundingin ‘Bethlehem’ ahiding dan a gen a (Mika 5:2), a genbangtahin ang tangtung hi. Apienna khanggui 42-tan zong a kisutsuh tou detdut a, tam zong sillam dang tah ahi.

Apiending thu Nungah Mary

velin, Jawlnei Isai in Mangpa Jesu min ding leh hina ding nga a gente lah ah, “Lamdangpa” chi zong imu uhi (Isai. 9:6-7). A dang li (4)-te khu poimawlou hilouin, tamna ‘Lamdangpa’ chi pen khu igen nuom pen uh ahi.

Samson pien dingin, Vansawltahin, apa Manoah kung ah ava gen chiengin lamdang sa in na min bang e, chi a adawhchiengin, Aman, ‘Lamdang’ chi in a dawng hi. I Mangpa Jesu khu Lamdangpa ahima bangin ahinkhuo leh asillam

kung a vansawltahin agen chiengin, ‘Lamdang’ asa a, kei pasal zong neiloupi chiin ‘lamdang’ sahna in apum ding hi. Adamsung a, annasepdante leh ashina tanpha ah lamdangpa ahina a sutangtung hi. Tamte lah a kipat a, igen nuom ahileh Jesu hina leh umna pou ah lamdanna a um zelzel hi. Tuaziehin,

eite zong ihinkhuo uoh kilamdanna ineitheina ding un Lamdangpa inei ding uhi.

2). Jesu Khrist Lamdangpa neiten Ama toh silthupitah/lamdangtahn a bawlthei leng uhi.

Awle, atung a i genbang un ‘lamdangpa’ umna leh Ama toh kituohtah a semkhawmten sillam dang tamtah a bawlthei leng uhi. Tuate isui ding uhi:

i). Peter in Pentekost ni-in, Hagau Siengthou thawpna toh khat vei maimai sermon a bawl leh mi sangthum (3000)-velin pienthana atang uhi. Tuabanah, Pentekost ni ma-in, mi 120-te tung tawnin leitung/khawvel pumpi a killing zou hi.

ii). Pu. Martin Lutherin Mangpa Jesu toh pang a hattuum siemphatna (Reformation) ang sem chiengin German gam leh Europe gamte a suling zou hi. iii). Pu. John Knox in Mangpa hatna toh Scotland gam pumpi a suling zou hi. iv). Pu. John Wesleyin, Pasian hatna toh England gam pumpi a suling zou hi. v). Pu. Evan Koberin, Pasian mapuina toh, Wales gam pumpi a suling zou hi. vi). Pu. D.L.Moody in Pasian Hagau Sienthou thawpna toh Manggam nna aseplaiin, Amaziehin, Gawtmun/Meidil population lakh ni-le-akim in asukiem zou hi a kichi hi. Aumzie

ahileh, ama ziehin gawtmun peiding mi 2.5 lakh-ten hundamna a tang uh china ahi. vii). Rev. Dr.(L) Billy Graham khu khawvel pumpi a mitampi mai a ding a, thugen tampen a kichiemte ahi. Aumzie ahileh, politician-te leh mithupi tuomtuomte zong amabang a mitampi mai a ding a thu gen aum sih uhi. Banah, hagau mangthai mantam pen leh khawvel pumpi suling pen a zong gen ahi. Tam atung a igente khu eite bang a mihing leh Khristian ahichiet uhi. Ahin, Pasian in azahziehua tambang din mun leh nnasemthei ahi uhi.

A langkhat lam ah, eite khun midang gentahlouin, eima na ngawn kisiemtha zouloute ihiban ua, ita inaute leh i innsung mite nangawn a sulingzouloute ihikhah ding uh a zau um mama hi.

3). Khrist a ding a hingngam/ding ngamten silthupitah a bawlthei leng uhi.

I gam uh Pasian mapuina toh ei Khristiante adingin a galmuon um in mundang bangin gawtna leh soisahna chite Khristian ihizieh un i tuohsih uhi. Tuaziehin, gingtu khat ihina ah Khrist a ding a ‘shingam’ sangin ‘Khrist a ding a hin ngam’ a kulin poimaw zaw hi. I Bible uah tuabang a ettawn ding khanglai tamtah i mu uhi. Tangval, Joseph

zong itheisa bangun, Potifer zi in, enla a, luppi ding a, azawlwawl laiin, “Ka pu in neisa chin teng tung ah etkolna nna leh mopuohna ang pia a, ahin nang tung ah ang pekha sih hi. Bangchiin, Pasian mai ah tami khelna kabawlwthei diei”? chi’n a ding ngam hi. Tuachin, apinu khun a puon a, amat chiengin, khelna leh suolna mun ataisan a, apuontuolpi anuosie hi. Rev. (L) Lalngaisanga in, “Joseph in tambang a Potifer zi apat a sawlna/ khemna a tuohlaiin, tulai bangin Bible tang pansia ding a um nai sih a, Pasian a ginziehin khelna mun khu a taisan hi” a chi hi. Apinun, a puontuolpi ah man nan leh a hinkhuo hoi (good character)-a taipi zou or khelna mun ataisan ngam hi. Sawltah Paulin, Timothy kung “Na khanglai tahsa utnate taisan in” a chi khu azuizou hi.

Amabanglou tahir, Samsom in, khelna mun a, a kuolkuol zing ziehin, khawvel amihat pen ding a, piengpa khu atopin, naupangte kimawlna in a um a, amitte kheikhieh piehin a um a, ahunloutahin ashilaw hi.

Awle, i gen masah uh, Joseph khu Potifer zinun zouin heh in thongsung (Jail)-sung ah khumin um nan leh atopin, jail apatin direct promotion amu a, Izipt (Aigupta)-gamsung leh gam dang tamtah a,

kieltun sungin, tulai hileh ‘food minister or governor’ in dopsangin a um a, ama mang lekhiehthei ziehin mitam tah kiel-le-tah a, shiding lai khu guolzawlna leh hinna tungtu a suohta hi. Pasian a ding a, ahin ngam ziehin atop a guolzawlna tampi tangin tunidawng in mite ettawn khanglai ang hitou pehta hi.

Tuabanah, Daniel leh alawm thumgte zong leengpa nehbambang neding a, hamphatna atan laiun, Pasian a ginziehun, anuolua, zu-le-sate nelou a, annte louhing leh tuisihte pedingun a ngen hi. Tuachin, nisawm (10)-sung enkhie ding un angen ua, Pasianin zong guolzawlna a guolte uh sangun ahoizaw uhi. Banah, lengpan Dura phaizang a milim lienpi khat mizousie biehi ding a, thu a piehlaiin, Daniel lawmthumte a ut sih uhi. Tuachin, meilipi sung a pailut ding a gihlai-un zong a zausih ua, atopin meilippi sung ah apailutta uhi. Ahin, Pasian a ding a, ahin ngam ziehun shilouin, meilippi sung ah, mithum kipailai khu mili (4)-a phata ua, khat pen khu Pasian tapa abang hi chiin amu uhi. Atopah, leengpa ngelin zong Daniel lawmte Pasian khu Pasian hing leh biehtah ahithu a puongta hi. Tunin, nag –le-kei zong, nichin in Pasian a ding a hing ngam ding in ikingenun ikichiel uhi. Pasian

a ding a hingngamte khun Khrist adingin sillam dangte bawlin Pasian min atawisang leng uhi.

4). Dihtatna hinkhuo toh i hing ding uhi.

Tuniin, khanglaite ikilam danna ding ua kul-le-poimaw isah uh ahileh sum-le-pai a dihtatna ahi. Azieh ahileh tuni-a khanglaite khu dachieng a, ilocal hattuumte, District-te, Presbytery leh Synod lieng tanpha a, lamkai hing hidingte

ihiziehun ahi. Tu ikhangelai hilai a kipan a dihtatna hinkhuo a ikisuhlam dang sih leh tahsa-le-hagau lamah i khangun ma isawn ngaingai sih ding uhi. Mi government nnasem a dihtatloute bawn apap um a, igen leh ei hattuum sung a sum-le-pai a dihtatloute khu bangzata in apap aum diei? chi khu khanglaiten ithei un dihtatna lampi ah ikisiem lamdang ding uhi. Manpan simtute hing guolawlta hen!!!

.....

“CORAM DEO – PASIAN MAI AH”

- M. Manglianthang Zou

Coram Deo ahileh Latin kamteng ahia, “Pasian mai ah” china ahi. Christian te adinga, ibawlding (purpose) thupipen khu Protestant Reformation (16th cent) hun in Martin Luther in “Christian te khu Pasian mai a (CORAM DEO) adeibang bawl a nunta ding te ihi uhi” chi’n ana hil chien hi.

Atangpi in Hindu te kijatat dante toh eimi te kite ka in iki tai hil leng ua, hinanleh atah tah a gen in, miteng teng in silhoi bawl nanleh zong Piangtha ahi sih leh Pasian mai ah sim tel ahi sih ding hi. Silhoi ibawl na ding jieh te ahileh:

Pasian hutdamna jieh a Amai ah silhoi bawl ding kizam hi (Laate. 56:13). Hundamna itang chieng in Christian akihi bep a,

Christian ihi leh nnasep hoi apat ipeng thei sih ding hi. Jesu ka Mang leh hundampa in pomta nang chieh ut dan dan a um thei ana hi vakhien lou hi.

Silhoi bawl dinga, Khrist Jesu a siem a um, Ama khut suoh ihi man in Amai ah silhoi bawl kizam hi (Eph. 2:10). Mihingte khu Pasian lim leh mel puoh a siem ihi man in, Setan nnasep khu mikhat in apu nnasem khalou a

midang nna vasesem, aman nabei
toh kibang ahi. Piangtha te ading a
ipu khu Pasian ahiman in, Khrist
tungtawn a silsiemtha te'n Ama
deibang bawl ding ahi.

Pasian min thupi nadinga
siem ihina ah, Amin tawisang leh
athupi nading a silhoi ibawl kisan
hi (Isai 42:7). Christian ikichi leh,
Abraham in Pasian thumanga anei
alam zousie anuasie (Siem. 12)
bang a, eite'n zong, kithupisahnate,
kiletsahnate, misang a ki chapou
sah zaw nate itaisan uh poimaw hi.

Mitamzaw te kingaisietna khat
ahileh, mite mitmu a hoi isawm a

izaw lou hun chieng ahi. Tuaziehin,
Pasian deibang a kalsuon zaw
a, lamhang tot khiel hun a zong
thupha tawi lei, ahing ngaidam
zing ding hi. Igingtat Pasian khu tu
in mu thei sih nanleizong, Aman
ahing mu zing a, eite'n Ama imu
hun hing tung ding hi.

Jesu nua zui, Christian ikichi leh,
Mihing te mitmei gua veng hilou
a, Pasian in hing enzing ahi chi
thei kawm a Coram Deo (Pasian
mai a) Adeibang sem zing ding
in simtu Hagau Siengthou in hing
mapui zing taken. Amen...

ONE WORLD GOVERNMENT

-Rev. Stephen Khupsianlal

Laisiengthou akhun khovel pumpi khu kivaihawmna khat nuoi
a umsa ding leh thunei khumding deitu mi tuom tuom na um uhi.
Tambang a One World Government ana deitute khu Mangpa Pasian
simmawtute leh Pasian hina lahpie nuomte ana hi leng uhi.

Tambang mite khun One (Genesis 10:8-10).
World Government tungtawn
in mihingte khu suoh leh sal a
zahding ana tup ua, michinteng
khu athu thu ua bawl ana tup uhi.

NIMROD : Nimrod khu leitunga
mihattah ana hi a, sabengmi
hattah zong ahia, a leenggam khu
Shinar gam a Babel, Ereka, Akkad
leh Kalneh khuote ana hi ahi

Nimrod hunlai in leitung pumpi
khu ham khat kamsuo khat zang
ana hi ahi. Shinar gam a phaijang a
atenlai un minthan ding atup zieh
un van sukha ding Babel innsang
lamding ana sawm uhi. Tuachin
tehlei ana khen uh ahi.

Tambang a khovel pumpi a

minthang penpen leh thunei
penpen hi utna zieh in van Pasian
thangpaina ana hankhie ua,
Mangpa'n aham zah uh asuhbuoi
pieh ta a, leitungah akithazah ta
ua, tuni tan in ham tamtah izang
ta uh ahi.

PHARAOH : Egypt gam sunga
Joseph theikha lou Leeng tha
Pharaoh khat ahing um tah in
Israel hah leh suonte khu amaute
sanga tamzawta ahidan thei in
akhut nuoi ua akoi thei na ding
un puogih aguon ua, gou kholna
khopite Pithom leh Rameses
abawl sah uh ahi. Simen leh tehlei
abawlsah ua, gamlah ah nasep
chinteng zong gintah in asem sah
zing uh ahi.

Tua mai hilou in Hebru nau domte
kungah naupieng pasal pouma
tha ding in thu penalai uhi. Egypt
leengten khovel pumpi One World
Government deina ziehin michin,
namchin khu akhut nuoi uah koi
ana sawm ua, nausen tamtah ten
shina ana tuoh law uh ahi. Pharaoh
khu Pasian banga kigen in miten
ana bieh uh ahi (Exodus 1:8-14)

JENTEL LEENG LI TE : Daniel
7: 1-8 sungah khun Daniel in
gamsa li amu thu kigen hi. Tamte
khu leenggam li etsahna ahi a,
Babulon leeggam, Medo-Persia

leenggam, Greek leenggam leh
Roman leenggam te ahi uhi.
Tam leenggam te khun amau hun
lai in One World Government
nuoi ah leitung namchin athunuoi
uah ana koi ua, a leeng te ukhu
Pasian bang a kigel in, michin in
abieh ding un ana phut ua, abe
nuom loute ana that uh ahi.

Tambang mite khun khovel a One
World Government umding ana
dei ua, amau khu Pasian banga
kingaituo in Mangpa thangpaina
ana hakhe zel uh ahi.

I Mangpa Jesu vangkhun michin
in zalenna inei ding uleh khat leh
khat kituoh dildiel a ihinkhawm
ding uh ana dei a, Pasian khu Pa
khat a neikhawm a bit tah leh
lemtah a iumkhawm ding uh
deizaw hi.

Tulai itenna khovel azong One
World Government thu ahing
ging kia ta a, Pasian thangpaina
hing tungkia na ding naitah dan
hing theisah hi.

Galpi 2na bei zou a hing dingkhie
United Nations Organization
(UNO) khun leitunga One World
Government tunding ahitheh kia
na ding tup zing uhi.

Amaute khu Lucifer in a control
a, Rapture nua chienga Anti-

Christ in Jerusalem Temple ahing toukhum theina ding in tulai in khovel in kisingsahna nei tou lel lel ta hi. Tam khun Rapture naita ahidan zong hing theisah hi (Kihilna 13:1-6).

One World Government khun Pasian mawng mawng deilou uhi. Amau khu Pasian hi a ut ua, tuakhu Lucifer van apat a ahing kietna zieh khu ahi.

Tulai a One World Government hing umthei na dinga pan lahma umpen khu Rapture zou chienga kum 7 Tribulation gimthuohna gimnei hing um chienga Anti-Christ in Jerusalem apat leitung pumpi a vai ahawm theina dinga kisingsahna khu ahi. Tua hun chieng in Pasian bangin ahing kigen dinga, namchin in ama abieh ding un phut dinga, a utlou te that ding hi.

Piengthalou leh hundam a umlou te khun tam Tribulation hunsung in Anti-Christ thunei na nuoi ah hinkhuo beidon huoi tah hing zang ding uhi. Tualeh Gamsa chiemtena 666 neilouten bangma alei thei sih ding ua, zong azuoh

thei sih ding uh ahi (Kihilna 13:16-18).

Rapture nua a hing um ding One World Government akhun Anti-Christ in khovel pumpi vaihawm khum ding ahilai in, sawt adai sih dinga, Armageddon (Megiddo phajang) mun akhun Mangpa'n tuami Government nuoi a umzousie khu azou dinga, tuachin kum 1000 Leenggam ah Mangpa Jesu lamkai a pang in One World Government dei huaitah hing um ta ding hi.

Tuazieh Setan lalna One World Government akhun gimthuona gimnei chinteng a um dinga, hinanleh Khrist Leenggam akhun kipahna chinteng ahing um ta ding hi.

Setan One World Government a ipanlou na ding un iMangpa Jesu khu iMang leh Hundampa a iki pom kin ding uh poimaw hi.

Rapture a nuasie a ium kha uleh Setan ibieh uh ngai ta dinga, kumtawn gawtmun meidiil ah gawtna ithuoh tou nalai ding uhi.

Mangpa'n hingguol zawl hen.

.....

UPA KAPSUANPAU



Upa Kapsuanpau khu phamsa Pu Khamzagin leh Pauzaniang te tapa tahpen ahia, 27th December, 1965 in Khianglam kholui (Sehken) khuo ah ana pieng hi.

Kum 1991 in Pasian ah pienthana ana nei a, December 21, 1983 in Rev. V. Vungzalian khut apat Baptisma ana tang hi.

August 15, 1987 in aji ittah Nu Goungainiang toh kitengin Ta Pasal-5 leh Numei-2 anei uhi.

Bohlui Hattuum Upa hidingin 1992 in telchingin ana um a, January 29, 1993 in MGP Khawmpi 37veina, Tangpijol Presbyterian Church ah Rev. Gouliau khut apat Upa namdetna ana tang hi.

Lentang District Chairman khatvei ana puohkhah banah, tuletui in zong Elected Chairman ahia, tu ahing tung ding Khawmpi a Chairman la ding ahi. Hattuum sungah mi gin-um leh kizang mama ahia, Khanglai ahi lai apat a Hattuumten kiphattuompi mama leh YCA Leader a zong ana kizang ahi.

Mangpan a Hattuumte enkol dinga mawpuohna a pieh bang dungzui in Presbyterian Church of India, Bohlui enkol a ginum tah a a seplai in BP Stroke apuasie in Lamka District Hospital tut ahia, Doctor ten theitawp suo in enkol nan uleh damzoutalou in October 16, 2023 in a tangtawn mun ding zuonin ahing na muolliem santa hi.

Atate: 1. Nh. (L) Niangsuanching
2. Pa Ginliankhup h/o Chiinpiansang
3. Tv. (L) Thanglianmang
4. Tv. Manglianlam
5. Tv. Kapmuanlun
6. Tv. Haulianlal
7. Nu Chingmuankim w/o Mangsuanthang Taithul

Tu numei-3 a nei hi.

ZPWF Column

**TUNNU LIMBEL PANPITE
AUGUST-SEPTEMBER 2023**

1. Reuben Hanglalmuan, Tuibuong	Rs.	1000/-
2. Nousuanching, Central Church	Rs.	1000/-
3. Nianghoiching Manlun Zou, Hiangtam	Rs.	600/-
4. Nienenniang, Moreh	Rs.	2000/-
5. H. Kapneithang Central Church	Rs.	4000/-
6. Chiinmuankim Central Church	Rs.	5000/-
7. Manneihat Central Church	Rs.	2000/-
8. Presbyterian Church, Tuining	Rs.	1260/-
9. S. Khamminthang, Tuibuong	Rs.	1000/-
10. Thanglalmuan, Muallum	Rs.	10,000/-
11. Upa H Nengkhai, Central Church	Rs.	500/-
12. Ginpau & Family Singngat	Rs.	1566/-
13. S. Thangchinpau, Tuining	Rs.	100/-
14. Hauching Tuining	Rs.	20/-
15. Upa. Ginsuankhai, Tuining	Rs.	200/-
16. Engzaching, Tuining	Rs.	130/-
17. Pauliankhup Tuining	Rs.	100/-
18. Kimzaching, Tuining	Rs.	20/-
19. Chingbawi, Tuining	Rs.	60/-
20. Chingneikim, Central Church	Rs.	500/-
21. Niangpi, Zomi Colony	Rs.	4000/-
22. P/P Joseph Doulunlal, Moreh	Rs.	1000/-
23. PWF Awinchinkap Khuo - Anntang 57Kg leh	Rs.	580/-
24. PWF Central Church - Anntang 112Kg leh	Rs.	2510/-
25. PWF Emmanuel Khopi	Anntang	67Kg
26. PWF Daijang	Anntang	55Kg
27. PWF M. Muallum	Anntang	75 Kg
28. PWF Bohlui	Anntang	28Kg
29. PWF V. Bethel	Anntang	50Kg
30. PWF Zomi Bethel	Anntang	30Kg
31. PWF LDCC Hiangzou	Anntang	64Kg
32. PWF Zoumunnuam	Anntang	42Kg
33. PWF Maukot	Anntang	32Kg
34. Thingkangphai Mission Board: Anntang 2Bags, Alu 1bag, Atui 1 Box, Ruchi Gold 1Tin, Colgate 10Pcs.		

Petu zousie Mangpa'n hing guolzawl ta hen.

NOTE : A dihlou kha te Office a suhdih thei zing ahi.

Sd/- Nh. Lamdeichiin
Secretary for Women's Relation

ZPYF COLUMN

ZPYF Industry leh Kumpuon

Pasian mapuina zal in ZPYF in malam kisan zel hi. I gam buaina kawmkal ah Mangpa hoina itang ua Office te bang maintain zou nalai a um aman un zong lungadam thu Mangpa kung a i gen hi. Tambang komkal a sum leh pai hing lut ding um sunsun te District PYF, Unit PYF ten hing submit thei ta ulechin i lungdam dinga mai nawt dan zong hing nuam dom ding hi. Tam anuoi ah theisahna khatvei toh talang kia va ui.

The Leader/Secretary
All District and Branch Church
Zou Presbyterian Youth Fellowship

Thupi: Industry leh Kumpuon man hing submit ding a theisahna.

Manggam a seppih deitahte,
Amasan ang pei kia ding i Mangpa Jesu min in chibai.

Atung athupi kitahlat bang leh 2nd OB meeting R/No.4na dungjui a District Chin PYF leh Branch Church PYF Industry leh Kumpuon man te hing kaikhawm a office hing submit ding in I ki ngen un I ki theisah uhi,

District	Industry
1. Central District.....	Rs.10,000/-
2. Lamka District.....	Rs.10,000/-
3. Lentang District.....	Rs.10,000/-
4. Tuivai District.....	Rs.6,000/-
5. Singngat District.....	Rs.7,000/-
6. Suolam District.....	Rs.6,000/-
7. Tuiningkuol District.....	Rs.6,000/-
8. Gunpang District.....	Rs.6,000/-
9. Zotang District.....	Rs.6,000/-
10. Imphal District.....	Rs.7,000/-

BRANCH CHURCH:-	
a) Delhi.....	Rs.8,000/- (Paid)
b) Shillong.....	Rs.8,000/-
c) Bangaluru.....	Rs.5,000/-
d) Chennai.....	Rs.5,000/-

Tualeh a december tan a Youth Co-ordinator kunga hing pekim chiat ngei dingin Pasian min in ikitheisah sawnsawn uhi.

Mangpan hing umpi in hing mapui zingta hen.

Manggam ah naseppih uh

T. Naomi Goulianaching
Youth Co-ordinator, ZPYF

PATRON MEMBER-TE

001. Upa Gouzamang	002. Pu Hav. Khamchinkhup	003. Pu Khamzalam	004. Pu Chinzasuan
005. (L) Upa Liansuanpau	006. Pu Khamchinthang	007. Pu S. Dalthang	008. Upa Kapkhanthang
009. (L) Upa Langginmang	010. Upa S. Nangkhanlal	011. Pu S. Lamkhotang	012. Upa Dr. M. Lachinkhai
013. Upa Khamchinjam	014. (L) Upa D.K.Manlun	015. Upa Suankhanmang	016. (L) Upa Khupgou
017. Upa Chinkham	018. Upa Ngulchinkham	019. (L) Rev. V. Vungzalian	020. Rev. Retd. Kamkhosoi
021. Rev. Tualzachin	022. Rev. H. Nengzaton	023. Rev. Awnkhankhup	024. Rev. Dr. Hangpi Manlun Zou
025. (L) Pu Tuanzapau	026. (L) Rev. Ginchinjam	027. (L) Rev. Khamzasuan	028. Upa T. Lamkhothawng
029. Upa Khaichinmang	030. Rev. Stephen Chinzathang	031. Pu Khupkhanmang	032. Pu Khaidohlian
033. (L) Hav. Khamzahang	034. Pi Vungzanuam	035. Pu T. Gouzadou	036. Upa Liensuonkap
037. Pi Zerkhochiin	038. Pi Hatkhanvung	039. (L) Pi Ngaihoiching	040. Pi Mankhannieng
041. Pu Goukhanmang	042. Pi Chingzalam	043. Pu S. Thianzakhai	044. Pi Kamkhanching
045. Pu Haukhanpau	046. Pu Tuallianmang	047. (L) Pu Dongkap	048. (L) Pi Chingkhanmang
049. Pi Donkhonian	050. Upa Henzakhup	051. (L) Pu Saichinpau	052. Pu Goumang
053. (L) Upa Khamkhanhang	054. Shie Laangkhanlal	055. Pu Khamkhanlun	056. Upa L. Tualkhanpau
057. Upa Jamsianmung	058. Upa Ginzadong	059. Pu Kaizathang	060. Pi Goizanuom
061. Pi Thangneivah	062. Pu Khamzathang	063. Pi Donchin	064. Upa Liankhanmang
065. Pu Hauchinlun	066. Pu T. S. Lal	067. Pi Goichiin	068. (L) Pu T. Khupchinthang
069. Upa T. Kaizalam	070. Pu Paul Henkholal	071. (L) Pu Soikham	072. Rev. P.C. Manga
073. Rev. Khamchinkhai	074. Rev. Zamlianpau	075. Rev. Chinzapau	076. (L) Rev. Kamkhozam
077. (L) Upa Chinpu	078. Pu Zamkhanthang	079. Pu Chinglen	080. Miss Chinhaunieng
081. Upa P. K. Soia	082. Pu Goujakhai	083. Pi Niangkhanmang	084. (L) Evan. G.L. Joshya
085. Pi S. Chingkhanmang	086. (L) Pu Vumchinkhup	087. Upa Khaihenthang	088. Upa T. C. Pau
089. Upa Nengchinkap	090. (L) Upa Jamkhongam	091. Upa HT Manga	092. Nu Vahkholhing
093. Pu Hauliankap	094. Pi Chinnu	095. (L) Upa Ngulzakhai	096. (L) Upa T. Gougin
097. Pu Ginsuanhau	098. (L) Upa Langminthang	099. (L) Rev. David K.Samte	100. Upa T.S.K. Samte
101. Upa S.K. Khama	102. Pu Jamkhopao	103. Pu Thatthang Taithul	104. Pu Kamkhankap
105. Bhim Prasad Ghatani	106. Rev. M. Kapsuanthang	107. Nu Chingneikim	108. Rev. Khupkhansuan
109. Pi Mannuamching	110. Rev. Kaimuanlal	111. Upa Nengkhanlian	112. Nh. Deborah Zou
113. Pu T. Kuppa	114. (L) Rev. Mangsuanthang	115. (L) Pu Lamchinhou	116. Upa Pauchinlei
117. Nu Kimneihei	118. Upa Kamgenpau	119. Nh. Niangsuannuam	120. Nu Ngaikhanvung
121. Pu P. Sanjiv Zou	122. Upa M. Kaichinkham	123. Upa T. Sianchinpau	124. Upa Sianzahau
125. Pu L. Thenkhosoi	126. Pu Kamsuanhang	127. Upa Th. Kaikholam	128. Upa Lunchinthang
129. Pu P. Tongthang Zou	130. H. Nehzamang	131. Pu Thangsuankhup	132. Upa M. Kamzadou
133. Pu Jamkholian Munlao	134. Pu Sianzakhai	135. Upa Thangginsuan	136. Pu Kapminlun
137. Pi Tingzavah	138. Dr. M. Limlunthang Zou	139. Rev. Hauzalian Manlun	140. Rev. Suangliankap
141. Rev. Ginlianmang	142. Upa L. Mangminthang Zou	143. Upa Goukhanthang	144. M. Thangsuansang Zou

LIFE MEMBER-TE

001. (L) Upa T. Khupkhenpau	002. (L) Pu M. Ginzahau	003. (L) Pu Selzapau	004. Pu L.C. Pautungnung
005. (L) Pi Khamkhannieng	006. Pi Ngainuam	007. Upa Chinsuanthang	008. Upa Shanti Kumar
009. Pu Kamkhohau	010. (L) Pu Khamkhohau	011. Upa Khamzathang	012. Upa Chinkhanthang
013. (L) Pu Tongzathang	014. Pi Chiinneilam	015. Upa Kulthang	016. H/Sm. Upa Kaichinpau
017. Pi Niangzalam	018. Upa P. Doukholun	019. Pu Kapminlian	

Undelivered

Please return to:

The Editor

KHRIŒTIAN TANGKOU

ZPCS Office, Zomi Colony

Churachandpur - 795 128

P.O. Box - 48, Manipur, India

Synod Office Telephone No. (03874) 235105

Website: zousynod.org | email: info@zousynod.org

zpcs@rediffmail.com/zousynod05@gmail.com

7a,
